

## Evening Dogri (NSD) News

13- Dec. 2025

### खास खबरां

1. समूलचा राष्ट्र अज्ज 2001 च संसद पर होए दे आतंकवादी हमले दे शहीदें गी शरदांजलि अर्पित करा रदा ऐ। उपराष्ट्रपति- प्रधानमंत्री ते केन्द्री मंत्रियें अज्ज संसद भवन च शहीदें गी पुष्पांजलि अर्पित कीती।
2. सी.डी.एस. जनरल अनिल चौहान होरें आखेया ऐ जे भारती रक्षा बल म्हेशा तयार ते प्रासंगिक बने दे रौहने लेई बदलदे म्हौल स्हाबै अपने आप गी ढालने ते सुधारें गी अपनाने लेई वचनबद्ध न।
3. अमरीकी प्रतिनिधि सभा दे त्रै सदस्यें राष्ट्रपति डोनाल्ड ट्रम्प हुंदे भारत थमां आयात पर 50 फीसद- शुल्क लाने लेई घोषत कीते गेदे राष्ट्री आपातकाल गी रद्द करने दा प्रस्ता पेश कीता।
4. फुटबाल दे दिग्गज खडारी लिचोनेल मेस्सी दी कोलकाता जात्तरा दे दरान अज्ज Salt Lake स्टेडियम च प्रशंसकें सुरक्षा घेरा त्रोडियै हंगामा करी दिता।
5. मौसम विभाग नै हरियाणा- चंडीगढ़- दिल्ली- हिमाचल प्रदेश- पंजाब- उत्तर-प्रदेश ते देसै दे पूर्वोत्तर हिस्सें च घना कोहरा छाने च ब्हाई दी गुणवत्ता बड़ी मती खराब श्रेणी च बनी दी ऐ।

<><><><><><>

### Parliament Attack

समूचला राष्ट्र अज्ज संसद आतंकी हमले दे शहीदें गी श्रद्धांजलि अर्पित करा'रदा ऐ। 13 दिसंबर 2001 गी अज्जै दे गै दिन सुरक्षाकर्मियें संसद दी राक्खी करदे होई सर्वोच्च बलिदान दिता हा। उपराष्ट्रपति ते राज्यसभा दे सभापति सी.पी. राधाकृष्णन, प्रधानमंत्री नरेन्द्र मोदी ते केन्द्री मंत्री पीयूष गोयल, जितेंद्र सिंह, किरन रिजिजू ते अर्जुन राम मेघवाल होरें संसद भवन च शहीदें गी पुष्पांजलि अर्पित कीती। लोकसभा च विपक्ष दे नेता राहुल गांधी, कांग्रेस दिएं वरिष्ठ नेता सोनिया गांधी ते होरनें सांसदें बी शहीदें गी पुष्पांजलि अर्पित कीती। राष्ट्रपति द्रौपदी मुर्मु होरें अज्ज संसद हमले दे बहादुर सुरक्षाकर्मियें गी श्रद्धांजलि अर्पित कीती। सोशल मीडिया दी इक पोस्ट च राष्ट्रपति होरें आखेआ जे राष्ट्र ओकडे नायकें दी दलेरी, वीरता ते बलिदान गी नमन करदा ऐ, जिं'दी कर्तव्य निश्ठा भारत दी राष्ट्री भावना गी लगातार मार्गदर्शन दिं'दी ऐ। उ'नें आखेआ जे देश शहीदें ते उ'ंदे परोआरें दा म्हेशां कर्जदार रौहग। राष्ट्रपति होरें आतंकवाद दे सबनें रूपें कन्नै लड़ने दे भारत दे मजबूत धेइये गी बी पक्का कीता। प्रधानमंत्री नरेन्द्र मोदी होरें आखेआ जे देश ओकडे सबनें वीर

जवानें गी चेत्ता करा'रदा ऐ, जि'नें ब'रे 2001 च संसद पर होए दे आतंकवादी हमले च जिंदु दा बलिदान देई दिता हा। सोशल मीडिया पोस्ट च श्री मोदी होरें आखेआ जे बड़े भारी खतरे दे दरम्यान बी साठे सुरक्षाकर्मि'एं दी दलेरी, सतर्कता ते निश्ठा सराहनेजोग ही। देश उं' दे सर्वोच्च बलिदान लेई सदा उं'दा कर्जदार रौहग।

<><><><><><>

### CDS General Chouhan

प्रमुख रक्षा अध्यक्ष जनरल अनिल चौहान होरें आखेआ ऐ जे भारती रक्षा बल म्हेशां तैयार ते प्रासंगिक बने दे रौहने लेई बदलदे हालात मूजब अपने आप गी ढालने ते सुधारें गी अपनाने लेई वचनबद्ध ना। श्री चौहान होरें आखेआ जे जंग ते जंगी-कला इक बड्डी क्रांति दे शिखर पर ऐ। हैदराबाद दे नेडे दुंडीगल च स्थित वायु सेना अकैडमी च 216में बैच दी सांझी दीक्षांत परेड च जनरल चौहान होरें आखेआ जे भारत दी ताकत मजबूत संस्थानें, लोकतांत्रिक स्थिरता ते थेहारबंद बलें दी अननुदृ बवसायिकता पर टिकी दी ऐ। उ'नें आखेआ जे ऑपरेशन दी तीव्रता भामें गै घट्ट होई गई होऐ, पर ऑपरेशन सिंदूर जारी ऐ। उ'नें आखेआ जे नमें अधिकारी ऐसे समें च वायु सेना च शामिल होआ करदे न जिसलै इक नमां सामान्य स्वरूप मजबूती कन्नै स्थापत होई गेदा ऐ। उ'नें आखेआ जे संगठित ढांचे, सांझे अभियान ते रक्षा खेत्तर च आत्मनिर्भर भारत दा राश्ट्री लक्ष्य, देशै दी फौजी ताकत दे भविष्य गी आकार देआ करदे न। एह्दे शा पैहले प्रमुख रक्षा अध्यक्ष होरें सिखलाई पूरी करने आहले फ्लाइट कैडेट्स गी राश्ट्रपति कमीशन प्रदान कीता। उ'नें फ्लाइट कैडेट्स गी विंग्स ते ब्रेवेट्स बी प्रदान कीते ते सिखलाई दे दरान उत्कृष्ट प्रदर्शन करने आहलें गी पुरस्कार दिते। परेड च भारती तटरक्षक बल दे 8, भारती नौसेना दे 6 ते वियतनाम दे 2 सखेत्रु'एं सने कुल 244 सखेत्रु शामिल होए। बक्ख-बक्ख दलें दे ब्हाई प्रदर्शन, इस समारोह दे मुख आकर्षण रेह।

<><><><><><>

### PM Visit

प्रधानमंत्री नरेन्द्र मोदी औंदी 15 दिसम्बर थमां जार्डन- इथोपिया ते ओमान दे दौरे पर रवाना होगन। इस बारे नमीं दिल्ली च मीडिया गी जानकारी दिंदे होई वदेश मंत्रालय दियें सचिव डाक्टर नीना मलहोत्रा होरें दस्सेया जे प्रधानमंत्री हुंदी एह जात्तरा जार्डन नरेश अब्दुल्ला द्वितीय बिन अल हुसैन हुंदे साहे पर 15 ते 16 दिसम्बर गी होआ करदी ऐ। सचिव होरें दस्सेया जे प्रधानमंत्री हुंदा जार्डन दा एह पैहला-पैहला दौरा दौनें मुखें बश्कार कूटनीतिक सरबंधें दी स्थापना दे 75एं बरे दे मौके पर लगा करदा ऐ। इस दरान दौने नेता आपसी सरबंधें दे सब्बनें पैहलु'एं दी समीक्षा करगन ते इलाकाई मुहें पर बी बचार बटांदरा

करगंन। डाक्टर मलहोत्रा होरें दस्सेया जे 16 ते 17 दिसम्बर गी प्रधानमंत्री हुंदा इथोपिया दा दौरा आपसी सैहयोग गी होर तगड़ा बनाने दी भारत दी वचनबद्धता गी दर्शांदा ऐ। 17 ते 18 दिसम्बर गी श्री मोदी हुंदे ओमान दे दौरे बारे जानकारी दिंदे होई सचिव अरुण कुमार चैटर्जी होरें दस्सेया जे इस दौरे दौरान इक उच्ची सतह दा डैलीगेशन बी श्री मोदी हुंदे कन्नै ओमान जाहग।

<><><><><><>

### US House of Rep

अमरीकी प्रतिनिधि सभा दे त्रै सदस्यें राष्ट्रपति डॉनल्ड ट्रम्प हुंदे आसेआ घोशत राष्ट्री आपातकाल गी रद्द करने लेई इक प्रस्ताऽ पेश कीता ऐ। एह्दे तैह्त्त भारत थमां आयात पर 50 फीसद तगर शुल्क लाया गेआ हा। प्रस्ताऽ च इ'नें उपायें गी अवैध ते अमरीकी श्रमिकें, उपभोक्ताएं ते आपसी सरबंधें लेई नुकसानदायक करार दित्ता गेआ ऐ। सांसदें देबोरा रॉस, मार्क वेसी ते राजा कृष्णमूर्ति होरें आखेआ ऐ जे अगस्त म्हीने आपातकालीन शक्तियें दे तैह्त्त लाए गेदे शुल्क गैर-कनूनी न। उ'नें आखेआ जे एह् शुल्क अमरीका ते भारत दे सरबंधें गी नुकसान पुजांदे न ते अमरीकी उपभोक्ताएं लेई लागत बी बधांदे न। प्रस्ताऽ दा मकसद 27 अगस्त गी भारती चीजें पर लाए गेदे बाद्दू 25 फीसद शुल्क गी रद्द करना ऐ। एह् शुल्क पैह्ले थमां लागू 25 फीसद शुल्क दे अलावा हा।

<><><><><><>

### Communication Ministry BSE

संचार मंत्रालय ते बॉम्बे स्टॉक एक्सचेंज-बी.एस.ई ने डाक कर्मचारियें गी म्यूचुअल फंड वितरक दे रूप च प्रमाणित करने लेई इक समझौता ज्ञापन पर दस्तख्त कीते न। चुने गेदे डाक कर्मचारी इस प्लेटफॉर्म दे माध्यम कन्नै निवेशकें गी सेवां प्रदान करडन ते म्यूचुअल फंड सरबंधी लैनदेन गी सौक्खा बनाडन। मंत्रालय ने इसी माली समावेशन गी मजबूत करने ते देश भरै च निवेश उत्पादें तगर पुज्ज बधाने दी दिशा च इक बड्डी गैह् करार दित्ता ऐ। मंत्रालय ने आखेआ ऐ जे एह् पैह्ल ग्रामीण, अद्-शैहरी ते घट्ट सेवाएं आह्ले इलाकें च आर्थिक गतिविधिएं गी अग्रे बधाने आस्तै भारत पोस्ट दे बड्डे डाक नेटवर्क दा लाहू ठोआंदी ऐ। एह् भारत पोस्ट गी गाहकें गी आधुनिक निवेश विकल्पें तगर पुज्ज प्रदान करने च बी सक्षम बनाग। मंत्रालय ने मेद बुज्झी ऐ जे देशै दे सबनें शा बड्डे म्यूचुअल फंड वितरण प्लेटफॉर्म निवेश गी लोकतांत्रिक बनाग ते माली बजारें च व्यापक भागीदारी गी बढ़ावा देग। समझौता ज्ञापन त्र'उं ब'रें लेई वैध रौहगा ते एह्दे च नवीनीकरण दा बी प्रावधान ऐ।

<><><><><><>

## Electronics & IT Ministry

इलेक्ट्रॉनिक्स ते सूचना प्रौद्योगिकी मंत्रालय दी इंडियन कम्प्यूटर इमरजेंसी रिस्पॉन्स टीम (सर्ट-इन) ने साइबर सुरक्षा पर यूरोप, अमरीका ते मध्य एशिया थमां आए दे पत्रकारें लेई इक संवाद सत्र दा आयोजन कीता। बदेश मंत्रालय दे सैह्योग कन्नै इस सत्र दा आयोजन कीता गेआ। सत्र दे दरान सर्ट-इन दे महानिदेशक डॉ. संजय बहल होरें साइबर सुरक्षा, संकट प्रबंधन, अति संवेदनशील घटनाएं दे मूल्यांकन ते साइबर घटनाएं पर आपसी तालमेल आहली प्रतिक्रिया च संगठन दी भूमिका पर लोऽ पाई। उ'नें देशै च 400 शा मते स्टार्टअप ते कुशल कार्यबल आसेआ संचालित बधदे साइबर सुरक्षा तंत्र दे बारे च जानकारी दित्ती। श्री बहल होरें असल समें च खतरे दा पता लाने ते प्रतिक्रिया देने च ए.आई. संचालित उपकरणें दे इस्तेमाल दे बारे च बी जानकारी दित्ती।

<><><><><><>

## Mansukh Mandaviya

खेड्ड मंत्री मनसुख मांडविया होरें अज्ज उत्तराखंड दे पौड़ी जिले दे कंडोलिया मैदान च सांसद खेल महोत्सव दा उद्घाटन कीता। इस दरान श्री मांडविया होरें राष्ट्र निर्माण च खेड्ड संस्कृति दे महत्व पर ज़ोर दित्ता ते पौड़ी गी हाई-एल्टीट्यूड स्पोर्ट्स हब दे रूपै च विकसित करने लेई केंद्र सरकार दी वचनबद्धता दोहराई। उ'नें आखेआ जे सांसद खेड्ड महोत्सव युवा प्रतिभाएं गी इक निरपक्व ते पारदर्शी मंच प्रदान करग। श्री मांडविया होरें आखेआ जे प्रधानमंत्री नरेंद्र मोदी हुं'दे नजरिये मूजब, पूरे देशै च ज़मीनी स्तर पर खेड्ड संस्कृति गी मज़बूत करने दे जतन कीते जा'रदे न। उ'नें विश्वास जाहर कीता जे इस महोत्सव राहें उभरने आहले प्रतिभाशाली खड्डारी 2030 दिएं राश्ट्रमण्डल खेड्डें सने अंतरराष्ट्री प्रतियोगिताएं च भारत दी अगुवाई करडन। उ'नें आखेआ जे जिसलै कोई खड्डारी मैदान पर जित्ता ऐ, तां पूरा देश बी ओहदे कन्नै जित्ती जंदा ऐ।

<><><><><><>

## Railway

उत्तरी रेलवे नै यात्रियें दी सुविधा गी ध्यानै च रखदे होई श्री माता वैष्णो देवी कटड़ा- नमीं दिल्ली बश्कार चलने आली वंदे भारत एक्सप्रेस रेलगड्डी दे समें च पैहली जनवरी 2026 थमां बदलाव करने दा फैसला लैता ऐ। नमें कार्यक्रम मताबक गड्डी नम्बर 22440- हूंन अम्बाला कैन्ट जंक्शन थमां रातीं 8 बजियै 52 मिनट दी थाहर- 8 बजियै 48 मिनट पर चलोग ते नमीं दिल्ली स्टेशन पर रातीं 11-10 दे बजाय 11 बजे पुज्जा करोग। समें च ए बदलाव श्री माता वैष्णो देवी दे शरदालुएं ते होरनें यात्रियें दा इस लोकप्रिय रुट पर सुविधाजनक सफर यकीनी बनाने लेई कीता गया ऐ।

### Messi Visit

फुटबॉल दे दिग्गज खडढारी लियोनेल मेस्सी हुं'दी कोलकाता दी जातरा दे दरान अज्ज सॉल्ट लेक स्टेडियम च उं'दे प्रशंसकें सुरक्षा घेरा त्रोटियै हंगामा करी दित्ता। मेस्सी छड़े 22एं मिंटे लेई गै स्टेडियम च आए। इस करी ज्हारें दी गिनतरी च स्टेडियम च मजूद उं'दे प्रशंसक बड़े मते निराश होई गो। मेस्सी हुं'दे औने दे तुरत मगरा गै स्टेडियम च अबवस्था होई गई। एह्दे परैन्त आयोजकें ते सुरक्षाकर्मियें गी कार्यक्रम निक्का करियै मेस्सी होरें'गी स्टेडियम चा बाहर लेना पेई गेआ। सुरक्षा च चूक ते उपद्रव दे कारण कार्यक्रम रद्द करी त्ति गेआ। मैहगे टिकट खरीदने आहले प्रशंसकें संपत्ति गी नुकसान पुजाइयै ते चीजां सुट्टियै बरोध प्रदर्शन कीता। केई दर्शकें भीड़ प्रबंधन दी कमी ते बुनियादी सुविधाएं दे त्रोटि पर बी नाखुशी प्रगट कीती।

<><><><><><>

### India Malaysia

भारत ते मलेशिया बश्कार सांझा फौजी अभ्यास हरिमौ शक्ति 2025 राजस्थान च महाजन फील्ड फायरिंग रेंज च जारी ऐ। एहू अभ्यास 18 दिसम्बर तगर चलगा। भारती सेना दे मताबक दौनें मुखें दे सैनिक अंतर-संचालन समर्थ ते परिचालन सरबन्धी तैयारियें गी बधाने आस्तै एहू सांझी सिखलाई हासल करा'रदे न। सिखलाई च मुख रूप कन्नै घुसपैठ रोकने ते आतंकवाद बरोधी अभ्यास, सांझी गश्त, घात लाइयै हमला करने दी तकनीक, हेलीकॉप्टर आधारित अभियान ते एम.आई-17 हेलीकॉप्टरें थमां छप्पियै हमला करना शामिल ऐ।

<><><><><><>

### LG Appointment

उपराज्यपाल मनोज सिन्हा होरें अज्ज श्रीनगर आले लोक भवन च कश्मीर थमां आतंकवाद दे शकार होए दे 39 लोकें दे नेड़में रिश्तेदारें गी नियुक्ति -पत्र सौंपे। इस दौरान एल.जी होरें आतंकवाद थमां पीडित होए दे लोकें दे परोआर आलें गी न्याय- नौकरियां ते सम्मान देने दी अपनी वचनबद्धता गी फही पक्का कीता। एल.जी होरें आखेया जे अज्ज इनें परोआरें लेई न्याय दा लम्मा इंतजार खत्म होई गेया ऐ। उनें अगगे गलाया जे आतंकवाद ने छड़ा लोकें दी जान गै नैई लेई - सगुंआ परोआरें गी बी तबाह कीता ऐ। उनें एहू बी आखेया जे दफा 370 गी खत्म कीते जाने मगरा हून आतंकवाद दे शकार होए दे लोकें दे परोआर बिजन कुसै हर-त्राह दे खुलियै सामने आवा रदे न ते आतंकवाद खलाफ अपनी अवाज बुलंद करा रदे न।

<><><><><><>

## CM Gulmarg

मुख्यमंत्री उमर अब्दुल्ला होरें अज्ज गुलमर्ग च केंई विकास परियोजनाएं दा उदघाटन कीता ते उनेंगी जनता गी समर्पित कीता। इनें परियोजनाएं दा मकसद सैलसफा सरबन्धी ढांचे गी मजबूत करना ते मशहूर गुलमर्ग Resort च सैलानियें गी उपलब्ध करोआई जा रदी सहूलतें गी होर बेहतर बनाना ऐ। उदघाटन कीते गेदे मुख् आकर्षणें च धुरी पर गै घुमकने आला दुनिया दा सब्बने शा उच्चा रेस्तरां बी शामिल ऐ- जेहदे च इक बड्डा हाल बी बनाया गया ऐ तां जे उत्थे बैठे दे लोकें गी कुदरती ते शैल-सनाखड़े नजारे दिक्खने गी लब्बी सकन। एदे इलावा मुख्यमंत्री होरें गुलमर्ग गोडोंला आले रस्ते पर इक महत्वपूर्ण थाहर अफरात च इक घुमकने आले कांफ्रेस हाल दा बी उदघाटन कीता ते कन्नै गै कोंगडोरी च एशिया दी सब्बने शा लम्मी स्की Drag लिफ्ट दा बी उदघाटन कीता। इनें ऐतिहासिक पैहलकदमियें कन्नै सैलसफा सरबन्धी बुनियादी ढांचे च बड्डा मता बाद्दा होग ते अंतराश्ट्रीय स्यालु खेड्डे आहले गुलमर्ग दी पंछान गी आलमी स्तर पर लेई जाया जाई सकोग।

<><><><><><>

## Delhi LG

दिल्ली दे उपराज्यपाल विनय कुमार सक्सेना होरें अज्ज नेताजी सुभाष यूनिवर्सिटी ऑफ टेक्नोलॉजी दे त्रीये दीक्षांत समारोह दुरान विद्यार्थिं गी सम्मानित ते संबोधित कीता। द्वारका च स्थित यशोभूमि च आयोजित इस कार्यक्रम च मुख्यमंत्री रेखा गुप्ता ते दिल्ली दे शिक्षा मंत्री आशीष सूद बी मजूद हे। श्री सक्सेना होरें सबनें विद्यार्थियें गी शुभकामनां दित्तिआं ते दीक्षांत समारोह दे विशे पर अपना संबोधन दित्ता। उ'नें जलवायु परिवर्तन ते कार्बन उत्सर्जन कन्नै सरबन्धत संयुक्त राश्ट्र परिशद दे लक्ष्यें दे प्रति वचनबद्धता फही पक्की कीती। उपराज्यपाल होरें मजूद विद्यार्थिं गी गुजारिश कीती जे ओहू अपने पेशेवर भविक्ख गी एकडे लक्ष्यें मूजब गै आकार देन तांजे देश ते दुनिया दा विकास जकीनी बनी सकै। इस मौके पर मुख्यमंत्री रेखा गुप्ता होरें आखेआ जे युनिवर्सिटी थमां पास होआ करदे नौजवान अपनी प्रतिभा ते मेहनत दे कन्नै देश दी तरक्की च अहम भूमिका निभाडन। उ'नें आखेआ जे नमियां काह्डां कड्डने दा रौंऽ अज्ज छड्डा बचार नेई, सगुआं नीति ते प्राथमिकता बनी गेदा ऐ।

<><><><><><>

## IMD Weather

मौसम विभाग नै हरियाणा- चंडीगढ़- दिल्ली- हिमाचल प्रदेश- पंजाब- उत्तर-प्रदेश ते देसै दे पूर्वोत्तर दे हिस्सें च घना कोहरा छाने दी शैका जताई ऐ। विभाग नै जम्मू-कश्मीर च मौसम बदलोखड़ा बने दे रौहने ते अंडमान ते निकोबार टापुएं च कल बिजली लिशकने ते अंधी-झक्खड़ दे कन्नै बरखा बरने दे असार दस्से न। तोंआई दिल्ली च ब्हाऊ दी गुणवत्ता बड़ी गंभीर श्रेणी च बनी दी ऐ। अज्ज दपैहरी तगर दिल्ली दी वायु गुणवत्ता सूचकांक 409 दर्ज कीता गया।

<><><><><><>